

Naalackersuisut suliffissaaleqinerup ataavartumik akiorneqarnissaanik siunertaqartumik ataatsimoorussamik pilersaarummik piaartumik suliarinninnissamik peqquneqarnissaanik Inatsisartut aalajangiiffigisassaattut siunnersuut. Pilersaarummi Sanaartugassanut Iluarsagassanullu Aningaasaateqarfimmi aningaasat uninngaannartut inuiaqatigiit akornanni sulisinneqalernissaanik, nunaqarfinni aalisakkerivinnik sullissinissamut isumaqatigiissutinut aningaasaliissutit amerlineqarnissaanik kiisalu illersorneqarsinnaasumik aalisagartassat amerlineqarnissaanik imaqassaaq. Pilersaarut Inatsisartut ataatsimiinneranni maanna ingerlasumi saqqummiunneqassaaq.
(Siumup Atassutillu Inatsisartunut ilaasortaataitai)

Nunatsinni annertuumik suliffissaaleqinerup piaartumik ataavartumillu annikillisinneqarnissaa siunertaralugu Naalackersuisut ataatsimoortumik periusissamik Inatsisartunut saqqummiussaqaarnissaanik Inatsisartut aalajangiiffigisassaattut siunnersuut.
(Inuit Ataqaqatigiinni, Partii Inuini, Partii Naleqqami Inatsisartuni ilaasortat)

Akissutitut allakkiaq

(Inuussutissarsiornermut Aatsitassanullu Naalackersuisoq)

Aappassaanneerera

Aallarniutigalugu Inuussutissarsiornermut Ataatsimiititaliap iluarsaassatut isumaliutissiissutaa innersuutigissavara, piffissamullu naatsumut soorlulusooq sivilisuumut suliffissaaleqinerup akiornissaanut ataatsimoorussamik iliuseqarnerup aallartisarnissaanik Naalackersuisut peqquneqarnissaat pillugu Inatsisartut aalajangiinissaanik siunnersuummik sukumiisumik isumaginnissimanerannik ataatsimiititaliaq qutsavigaara.

Inuussutissarsiornermut Ataatsimiititaliap akerliusoqanngitsup allannguutissatut siunnersuutaata suliffissaaleqinup annikillisinissaa pillugu Naalackersuisut pilersitaannut anguniagaannullu pitsaasumik tulluurtuusooq nuannaarutigalugu paasisinnaavara. Piffissamut sivikitsumut aamma sivilisuumut pilersinniakkanut.

Sanaartugassanut Iluarsagassanullu Aningaasaateqarfiup ileqqaagaralugit aningaasaataannit pitsaanerusumik atuisoqarsinnaanerata siuarsarneqarnissaa pillugu allannguutissatut siunnersuut Naalackersuisut akueraat, taamaattumillu katillugit 174,2 mio. kr.-nut sanaartornermik iluarsaassinermillu suliniutinik Naalackersuisut aallartisaareersimapput. Ukiumi matumani aallartinneqareersumik najugaqarfinni suliffinnik pilersitsisinnaaniarnissamut periarfissaasut

aallaavigalugit, aamma inuiaqatigiinni akuuffigisatsinni nalinginnaasumik annertunerusumik suliaqarnermik pilersitsiniarluni suliasat arlallit akornanni suliniutit toqqartorneqarput.

Sanaartugassanik iluarsagassanillu suliniutit immikkut ittumik aallartisaaviginerat tassaavoq Naalakkersuisut suliffeqartitsinissamut periusissiaata ilagisaa, anguniagaralugu ukiuni takkuttussani pingasuni piffissamut sivikitsumut soorlulusooq sivisuumut pilersitsinerit arlallit aqputigalugit suliffissaaleqisut amerlassusaannik affaannangortitsinissaq. Suliffeqartitsinermut periusissiaq sapaatit akunnialunnguit iluini tusarniaanermut illua'tungerisanut pingaarutilinnut tamanut tusarniaassutigalugu nassiussorneqassaaq.

Inuusuttut suliffissaaleqinerisa akiornissaannut immikkut ittumik iliuuseqarnissaq pillugu allannguutissatut siunnersuummut tunngatillugu oqaatigisinnaavara inuusuttuni suliffissaaleqisut ikilisinniarlugit nukittorsakkamik iliuuseqarnermut annertunerusunik tapiissutissat pillugit Naalakkersuisut 2015-imut aningaasanut inatsimmut qinnuteqarniarnerat. Anguniagaq tassaavoq ukiuni takkuttussani Piareersarfimmi tiguneqartut amerlisinnissaat. Iliuserisap ilarujussua atuagarsornerunngitsunut tunngasuutinneqassaaq, soorlu Piorsaavittut, Timi Asimitut assingusunik suliarisanut il.il. Taamaalilluta peqatigiilluta inuusuttut suliffissaaleqiunnaartillugit ilinniagaqalersissinnaavagut.

Kiisalu kommuneni tulluarsaasarnerup nukittorsarnissaanut, kiisalu tulluarsakkat 2-mi 3-milu innuttaasunut inuttut ineriartortitsinissamut neqeroorutillu ingerlannissaannut agguaassassanik nutaanik Naalakkersuisut pilersitsilersaartut oqaatigisinnaavara. Agguaassassat taakku ilaatigut kommunit nukittorsarnissaannik siunertaqarput, taamaalillutik suliffissaaleqisut tulluarsagaanerat erseqqinnerulerlunilu eqqorluarnerulissaaq. Pilersitamut tassunga AI 2015-2017-imut tapiissuteqartoqassasoq qinnuteqarfiuvoq.

Aammattaaq inuussutissarsiorfinni siuarsakkani sulisartunik ilinniagaqarsimanngitsunik piginnaanngorsaaneq Naalakkersuisut sakkortusarpaat, ingammik aatsitassarsiorfiusumi, aammali isumaginninnermik peqqinnissaqarfimmillu suliaqarfiusumi, kiisalu imarsiornermik ilinniakkani, taamaalilluta sulisartut tikisitat pinnagit sulisartut najugaqavissut isumannaarsinnaassagatsigit. Taamaattumik piffissami 2015-imit siumullu suliasaqarfimmut annertusisamik tapiissuteqarnissaq pillugu Naalakkersuisut qinnuteqarniarput, taamaalilluni ilinniagaqarsimanngitsuni piginnaanngorsaaneq annertusarneqarsinnaaniassamat.

Inatsisinik unioqquitsilluni sulisartunik avataanit tikisitsilluni sulisitsisarnermut nakkutiginninnerulernissamut siunnersuummut aamma oqaatigisinnaavara suliffinni arlalinni nakkutilliinermik takusaasarnissat pilersaarutigalugillu ingerlattarsimagatsigit, inatsisinik unioqquitsilluni sulisartunik avataanit tikisitsilluni sulisoqartannginnissaq isumannaarniarlugu.

Ingerlatseqatigiiffiit, kommunit aamma Namminersorlutik Oqartussat akornanni IBA-mik isumaqatigiissutit uuliasiornermik aatsitassarsiornermillu suliniutini najugaqarfinit sulisut suliffeqarfiillu minnerpaamik qanoq amerlatiginissaannik ukiumoortumik piviusunik anguniagassanik inissiisarput. Naalackersuisut anguniagaat tassarpiaavoq aatsitassarsiornermik suliniutini najugaqavissut peqataatinnissaannik siuarsaanissaq isumannaarinissarlu.

Sulisartut suliffiit tikinniarlugit ajornannginnerusumik nuussinnaalernissaannut siunnersuummut tunngatillugu ilisimatitsissutigisinnaavara, Naalackersuisut ukiumi matumani aaqqissuusseqqinnissamik saqqummiussaqaassammata, nuttarnerulestisniarluni ikiorsiissutinik pissarsinissamik pisariillisaanermut tunngasumik . Suliffiit pissarsiarisinnaaffiit kikkut tamarmik qinnuteqarsinnaassapput.

Naalackersuisut ataatsimiititaliamik isumaqatiginnipput, tassa nunaqarfiit pillugit sapaatit akunneri marluk matuma siorna ataatsimeersuartitsinitsinni anguniakkat saqqummiunneqartut piviusungortinniarneqassapput. . Taamaattumik kissaatigisarpasuit ajunngitsut piviusungortinnissaannut periarfissanik misissuisitassanik suleqatigiinnik malittarinnittussanik pilersitsisoqarpoq.

Kiisalu kalaallit nerisassaataasa nalitusarneqarnerisa siuarsarnissaannut ataatsimiititaliamik Naalackersuisut isumaqatiginnipput. Taamaattumik inoqarfinni mikinerni isorliunerusunilu inuussutissarsiornermik suliffeqartitsinermillu iliuuserisap nukittorsarnissaanut 2014-imut Aningaasanut Inatsimmi 14,8 mio. kr.-t immikkoortinneqarput. Pilersaarutip taassuma iluani ilaatigut aalisarnerup, piniarnerup, nunalerinerup, nerisassialerinerup, takornariartitsinerup aatsitassarsiorfiillu iluini aningaasat immikkoortinneqarput.

Tamakku saniatigut siunnersuutinik saqqummiussisunik nunaqarfinni tunitsivitsigut atugassat pitsanngorsarniarlugit suli annermik iliuuseqartoqarsinnaasoq Naalackersuisut isumaqataapput. Suliassa qarfimmut tapiissutit annertusarnissaat pingaarnarpaatut aalajangiisuussanngillat. Unammillertoqartarnermut inatsit sianigalugu tamanna pissaaq, aamma namminersortut aningaasaataannik inissaarutsitsinani. Taamaattumik suliassa qarfimmi tassani pissutsit pitsaanerit isumannaarniarlugit siunnersuummik piviusumik suliaqarnissamut piareersimavugut.

Sulinissaq akileraartarnermut tunngatillugu qanoq kajungernarnerulersinnaanera, kiisalu iluserisatigut politikikkut pilersitat qulaajarnissaat pillugit misissuinermut tunngatillugu Naalackersuisut aaqqissuussinernik arlalinnik misissueqqissaarinerat oqaatigisinnaavara, ilaatigut pisortanit ikiorsiissutisarnermut assigisaannulluunnit paarlaallugu suliffeqartuunerup kajungernarnerulernissaanik nassataqartussamik.

Taamatut oqaaseqarnikkut eqikkaallunga innersuutigissavara allannguutissatut siunnersuutinik
Inatsisartut akuersissuteqassasut.